

ВОСКРЕСНА СЛУЖБА 1 ГЛАСА В СУББОТУ НА ВЕЛИЦЕЙ ВЕЧЕРНИ.

На Господи, возвах, поставим стихов 10, и поем стихиры воскресны осмогласника, 3: и Анатолиевы, 4: и минеи 3, или 4, или 6, аще празднуется святой. Слава, минеи, и ныне, Богородичен гласа.

Стихиры воскресны, глас 1:

Стих: Изведи из темницы душу мою, * исповедатися Имене Твоему.

Вечерняя наша молитвы * прими Святой Господи, * и подаждь нам оставление грехов, * яко Един еси * Явлей в мире Воскресение.

Стих: Мене ждут праведницы, * дондеже воздаси мне.

Обыдите людие Сион * и обымите его, * и дадите славу в нем * Воскрешему из мертвых: * яко Той есть Бог наш, * Избавлей нас от беззаконий наших.

Стих: Из глубины возвах к Тебе, Господи, * Господи, услыши глас мой.

Приидите людие, * воспоем, и поклонимся Христу, * славяще Его из мертвых Воскресение: * яко Той есть Бог наш, * от прелести вражия мир Избавлей.

Ины стихиры Анатолиевы, глас тойже:

Стих: Да будут уши Твои внемлюще * гласу моления моего.

Веселитесь Небеса, * вострубите основания земли, * возопийте горы веселие: * се бо Еммануил грехи наша на Кресте пригвозди, * и живот даяй, смерть умертви, * Адама Воскресивый, * яко Человеколюбец.

Стих: Аще беззакония назриши, Господи, Господи, кто постоит; * яко у Тебе очищение есть.

Плотию волею Распеншагося нас ради, * Пострадавши и Погребенна, * и Воскреша из мертвых, * воспоем глаголюще: * утверди православием Церковь Твою, Христе, * и умири жизнь нашу, * яко Благ и Человеколюбец.

Стих: Имене ради Твоего потерпех Тя, Господи, потерпе душа моя в слово Твое, * упова душа моя на Господа.

Живоприемному Твоему гробу * предстояще недостойнии, * славословие приносим неизреченному Твоему благоутробию, * Христе Боже наш: * яко крест и смерть приял еси Безгрешне, * да миру даруеши Воскресение, * яко Человеколюбец.

Стих: От стражи утренния до нощи, от стражи утренния, * да уповает Израиль на Господа.

Иже Отцу Собезначальна, * и Соприсносуцна Слова от Девическаго чрева * Происшедшаго неизреченно, * и крест и смерть нас ради волею Приемшаго, * и Воскреша во славе, воспоем глаголюще: * Живодавче Господи, слава Тебе, Спасе душ наших.

Таже минеи стихиры святому.

Слава святому, аще имать.

Аще ли ни, Слава, и ныне, Богородичен.

Всемірную славу, * от человек Прозябшую, * и Владыку Рожашую, * Небесную Дверь воспоем Марию Деву, * Безплотных Песнь, и верных Удобрение: * Сия бо явился Небо, и Храм Божества: * Сия преграждение вражды разрушивши, * мир введе, и Царствие отверзе. * Сию убо имуще веры Утверждение, * Поборника имамаы из Нея Рожашагося Господа. * Дерзайте убо, дерзайте людие Божии: * ибо Той победит враги, * яко Всесилен.

Таже: Свете Тихий: Прокимен и прочая.

На стиховне стихиры воскресны, глас 1.

Страстию Твоею Христе, * от страстей свободихомся, * и воскресением Твоим * из ислания избавихомся, * Господи, слава Тебе.

Стих: Господь воцарися, * в лепоту облечеса.

Да радуется тварь, * небеса да веселятся, * руками да восплещут языцы с веселием: * Христос бо Спас наш, * на кресте пригвозди грехи наша: * и смерть умертвив живот нам дарова, * падшаго Адама всероднаго Воскресивый, * яко Человеколюбец.

Стих: Ибо утверди вселенную, * яже не подвижится.

Царь сый небесе и земли непостижимо, * волею распялся еси за человеколюбие. * Егоже ад срет доле огорчился, * и праведных души приемши возрадовашася: * Адам же, видев Тя Зиждителя * в преисподних, воскрес. * О чудесе! * Како смерти вкуси всех жизнь; * Но якоже восхоте мир просветити зовущий и глаголющий: * Воскресый из мертвых, Господи, слава Тебе.

Стих: Дому Твоему подобает святыня, * Господи, в долготу дний.

Жены муроносицы, * мура носяща, * со тпцанием и рыданием гроба Твоего достигоша, * и не обретша Пречистаго Тела Твоего, * от Ангела же уведевши новое и преславное чудо, * Апостолом глаголаху: * воскрес Господь, * Подаяй миру велию милость.

Слава, минеи, аще есть. Аще ли ни, Слава, и ныне, Богородичен:

Се исполнися Исаиино проречение, * Дева бо родила еси, * и по Рождестве яко прежде Рождества пребыла еси: * Бог бо бе Рождейся, * темже и естества новопресече. * Но о Богомати! * Моления Твоих рабов, * в Твоем храме приносимая Тебе не презри: * но яко Благоутробнаго Твоима руками носящи, * на Твоя рабы умилосердися, * и моли спаситися душам нашим.

Таже, Ныне отпуцаеши: Трисвятое. И по Отче наш:

Тропарь воскресен, глас 1:

Камени запечатану от иудей, * и воином стрегущим Пречистое Тело Твое, * воскресл еси Тринедневный Спасе, * даруяй миру жизнь. * Сего ради силы небесныя вопияху Ти Жизнодавче: * Слава Воскресению Твоему, Христе: * слава Царствию Твоему: * слава смотрению Твоему, Едине Человеколюбче.

Богородичен:

Гавриилу вещавшу Тебе Дево, радуйся, * со гласом воплощашеся всех Владыка, * в Тебе Святем Кивоте, * якоже рече праведный Давид: * явилася еси ширшая небес, * поносивши Зиждителя Твоего. * Слава Всельшемуся в Тя: * слава Прощедшему из Тебе: * слава Свободившему нас Рождеством Твоим.

В СУББОТУ НА ПОВЕЧЕРИИ

Канон Пресвятей Богородице, глас 1

Песнь 1

Ирмос: Горькия работы избавлься Израиль, * непроходимое пройде яко сушу, * врага зря потопляема, * песнь яко Благодетелю * поет Богу, * чудодеющему мышцею высокою, яко прославися.

Припев: Пресвятая Богородице спаси нас.

Ужасошася страхом Всецарице ангельская чиноначалия, хваляще Тя: поет же благодати ради всяк ум, яко Матерь Зиждителя: похвалы бо всякия превозшла еси чин, Христа рождши.

Лютыми напастьми томимь, и от враг стужаемь окаянный, с плачем приглашаю: свыше мне простри Пребогатая руку Твою, избавляющи мя, и безбедно пожити сподоби молитвами Твоими.

Слава: Души тайная прегрешения, лечбою милосердия исцели, и утиши плотское стремление Богородице: и врагов копия и стрелы возвращи, крепко в сердца их вонзи.

И ныне: Пажить древнюю потреби человекоубийственную, утроба девича Христа рождши: темже вся тварь радуется ныне, Пречистая, яко оживльшися: и согласно воспеваает Твоего Сына и Бога.

Песнь 3

Ирмос: Не мудростию * и богатством да хвалится смертный своим, * но верою Господнею, * православно взывая Христу Богу, * и поя присно: * на камени Твоих заповедей утверди мя Владыко.

Иаков великий на пути спя иногда, низходящия свыше лестницею, Дево, на землю ангелы видя, дивляшеся: и возбнув, прописа яве дверь Тя небесную.

Временным удержанием, в напасти ввержен окаянный аз, и бурями нападными томимь, увы мне, вопию: Яже Бога рождшая, и вознесшая рог наш, спаси мя молитвами Твоими.

Слава: С небесе руку крепкую простер, о всех Царю Христе, чувственных и мысленных, Иисусе мой, главы врагов под нозе положи, Богородицу Матерь Твою верно проповедающих.

И ныне: Исаия древле, очисти углем Духа, от Твоея утробы яве Пребогатая Дево, Сыну взываше родитися: Егоже в последняя времена, мене ради, без мужа родила еси.

Песнь 4

Ирмос: Слыша древле Аввакум Христе * чудный Твой слух, * и страхом взываше: * от юга Бог приидет, * и святыи от горы приосененныя чащи, * спасти помазанныя: * слава силе Твоей Господи.

Тебе яко сущую в женах красну и пречестну, яко из пустыни восходящу, и отрасль Христа на руку носящу, Мати Божия, проображаше міроначальник вопия: слава силе Твоей Господи.

Приклони ми ухо Твое Благая, и виждь мое озлобление, и бед умножение: к Тебе бо Владычице, душевное око простер, и с плачем колена приклонь, ныне молю вопия: остави ми напастей смущение.

Слава: Стену Тя неборимую ведый, привлечен мольбою, Твой раб ныне к Тебе прибегаю, и стрелы вражия, яко младенческия вмению недейственны, о Пребогатая! Темже и радуясь вопию: слава Богомати, Рождеству Твоему.

И ныне: Сила Вышняго Тя Дево осени наитием Божественнаго Духа: и тогда паче естества всяческих Господь, плоть и душу оживотворив, приедини Себе, пребыв в томжде естестве.

Песнь 5

Ирмос: Свет Твой незаходимый возсияй Христе, * в сердца верно поющих Тя, * мир подавай нам, паче ума. * Тем от нощи неведения ко дню светом Твоим текуще, * славословим Тя Человеколюбче.

Божественную Тя, провидев иногда Даниил, несекомуую гору, Препетая, вопияше проявленне, усещися от Тебе камению Богородия, Христу Спасу міра: Егоже вернии ныне чтуще, восхваляем Тя Богоневесто.

Напастьми окаянный многими падся, с болезнию и плачем сердца моляся, безстудно служитель Твой вопию: избави Богородительнице, от бед одержащих мое смирение, и веселия мя исполни.

Слава: Страстей моих свирепую пучину утиши, крепкою Твоею молитвою Благая, яже страстей кроме рождающая Христа: яко да в тишине души ныне живый, прочее жизни моя, в песнях воспеваю Тя.

И ныне: Бога како на руку носиши, рцы? и како доиши, всяческая рукою Содержащаго, о Дево Всеблаженная? Аз, рече, чиста пребываю и по Рождестве, Христа Бога рождаши, Адамов долг, и праматерний отъемши.

Песнь 6

Ирмос: Весь от страстей безмерных содержи, * и китом зол сниспадох: * но возведи из исления мя Боже, * якоже прежде Иону, * и верою безстрастие ми даруй, * яко да во гласе хваления, * и спасения духом пожру Ти.

Седения не отступль недр Родителя, в недрах Матерних Сын Предлетный: напоследок же, Иже прежде век Сый со Отцем, из утробы Девы произыде, вся к жизни безсмертней возводя, неизреченною благостию.

Веригами связан вражиями от озлобления, во адския верей, увы мне, низвергохся: но предстани, с Небесе явльшися, Богоотроковице Чистая, возставающаи мя Твоими молитвами служителя Твоего, и руку помощи даждь поющему Божественное Твое Рождество.

Слава: **В** ров погибелей окаянный впадох, и зверие мнози окрочают мя: но Владычице, молитвами Твоими камни отврати, и неврежда Твоего раба соблюди: Камень бо Краеугольный, Христа в ложеснах Твоих носила еси.

И ныне: Древле пророк божественных лик провозгласи Дево, Рождества Твоего образы: светел облак Тя, и свещник, и стамну, и трапезу, и небесную росу, хлеб, манну же и дверь, престол, и палату, жезл, рай, яко Христа Рождшую.

Господи помилуй, [трижды]

Слава, и ныне:

Седален, глас 1:

Мать Тя Божию свемы вси, * Деву воистинну, * и по Рождестве явльшуюся, * любовию прибегающе к Твоей благодати: * Тебе бо имамы грешнии Предстательницу, * и Тебе стяжанием в напастех спасение, * Едину Всенепорочную.

Песнь 7

Ирмос: Придоша яко чертог пещный * пламень нестерпимый, * иже за благочестие иногда отроцы святии показавшися яве, * и согласно воспевающе, * песнь пояху: * отец Боже благословен еси.

Шествуя превечный дверьми непроходными Твоими Всецарице, чиста Твоя знаменья и цела сохрани, чиста и по Рождестве. Темже вопием: отец наших Боже, благословен еси.

В печь ввержен седмочисленными пламеньми опаляюся от душеубийственных бед: но Сама росу ми одожди Владычице Благая, Твоими мольбами, да вопию: благословен Бог отец наших.

Слава: Страстьми престаревся, и неослабными напастями и скорбьми, и доспев к западом жития моего, добродетелем непричастен, ленистою снесен быв, вопию Ти, Владычице: утешение земным, помилуй мя!

И ныне: Троице во единстве православно служаще, Тя Мати Дево Чистая, яко Бога плотию рождшую проповедающе земнии, божественне поем: отец наших Боже, благословен еси.

Песнь 8

Ирмос: Чуда преестественнаго * показа образ, огнеросная печь древле: * огонь бо не опали юнныя дети, * Христово являя безсеменное от Девы * Божественное Рождество. * Тем воспевающе воспоем: * да благословить тварь вся Господа, и превозносит во вся веки.

Слово всеистинное священника вообрази Рождество Твое, Дево: воистинну бо родила еси Слово Божие, и ложесна не разверзе Дево, имиже пройде Бог. Тем радуящаяся Богородицу Тя по долгу согласно воспеваем, и превозносим Чистую во вся веки.

Терние возрастшее в души моей недействительно, Божественным огнем попали Пречистая, и Твоими молитвами на добродетели возстави мя, творити плодоносие Христу: из Тебе бо цвет присно живой прорастиши, тварь всю украси. Тем Тя Богородительницу Чистую почитаем во вся веки.

Слава: **И**сцеление в лютых Богородительнице, неболезненно подаждь ми вскоре: впад бо в скорби и беды, Твою скорость в заступление окаянный призываю рыдая. Темже Пречистая, ускори изъяти мя, и спаси от всякия муки, яко да благословя воспеваю Твое Рождество.

И ныне: **Д**ревле Тя прозябший Ааронов жезл вообрази Дево: Ты бо Едина родила еси прозябением без мужа, Небесный ныне Дождь приемши во чреве. Тем веселящися, Тя Богородицу по долгу согласно вси поем, и превозносим во вся веки.

Песнь 9

Ирмос: **Н**еизглаголанное Девы таинство: * небо бо сия, и престол херувимский, * и светоносный чертог показася * Христа Бога Вседержителя. * Сию благочестно яко Богородицу величаем.

Преславно Девы таинство: егоже бо не вместиша вышненебесная величия, вмести во чреве. Темже сопедшеса ублажаем Ю, и верно веселящися величаем.

Видяще Тя Едину, яко вышшую небес, Божию зарю, Нескверная, Престол херувимский, и чертог, и одр свят, земнии восхваляюще, Христа Бога нашего величаем: Егоже от чресл чистых родила еси.

Слава: **О**крест мене скорби многи, и злы напасти ныне нападающе, болезни же и лютыя грехи в ров ввергоша. Темже Тя молю в горести души моей, Пресвятая Богородице, избавление обрести ми.

И ныне: **У**мири мир, Христе, мольбами Чистыя Богоотроковицы, низлагая вражию силу и тишину неизглаголанную нам устраоя, во веки сохрани.

Таже: **Д**остойно есть: **Т**рисвятое. **К**ондак воскресен, и отпуст.

НА ПОЛУНОЩНИЦЕ

Канон ко Святей и Живоначальной Троице, егоже краестрочие:
Едино Тя пою Трисолнечное Естество. Глас 1.

Творение Митрофаново

Песнь 1

Ирмос: Твоя победительная десница * боголепно в крепости прославися: * та бо безсмертне, * яко всемогущая, * противныя сотре, * израильтяном путь глубины новосоделавшая.

Припев: Пресвятая Троице Боже наш, слава Тебе.

Едино Триипостасное Начало, серафими немолчно славят: Безначальное, Присносущное, творительное всех, непостижимое, еже и всяк язык верно почитает песньми.

Да человеком Единственное, Трисиятельное Твое явиши Божество, создавый прежде человека, по Твоему Образу вообразил еси, ум ему, и слово и дух дав, яко Человеколюбец.

Слава: Свыше показуя единственную Богоначальных в Трех Ипостасех державу, Отче, рекл еси Равнодетельному Твоему Сыну, и Духу: приидите сошедше, языки их слияим.

И ныне, Богородичен: Ум убо есть Нерожденный Отец, образно премудрыми предречеся, Слово же Собезначально, Соестественный Сын, и Дух Святый, иже в Деве Слова создавший воплощение.

Песнь 3

Ирмос: Едины ведый * человеческого существа немощь, * и милостивно в не воображся, * препояши мя с высоты силою, * еже вопити Тебе Святый: * Одушевленный Храме * неизреченныя славы Твоя, Человеколюбче.

Ты древле яве Аврааму яко явился еси Триипостасный, Единствен же естеством Божества, богословия истиннейшее образно явил еси: и верно поем Тя, Единоначального Бога, и Трисолнечного.

Из Тебе родивыйся боголепно нетленно Отче, возсия Свет от Света, Сын неприменен, и Дух Божественный, Свет изыде: Единого Божества светлости Триипостасней покланяемся верно, и славим.

Слава: Единица Троица преестественне, неизреченно паче смысла, умными существы славится, трисвятыми гласы немолчную вопиющими хвалу: имиже согласно поется и нами Триипостасный Господь.

Богородичен: Из Тебе временне без семени произыде Вышшпетный, уподобивыйся нам Невидимый, и единому естеству и господству Отчу научив, и Сыновню, и Духову, Богородице: темже Тя славим.

Господи помилуй, [трижды]

Седален, глас 1.

Подобен: Гроб Твой Спасе:

Отцу и Сыну поклонимся вси, * и Духу Правому и Равночестну, * слава Троице Несозданной, * и Пребожественной силе, * Юже славят безплотных чинов: * Сию днесь и земнороднии * со страхом верно восхвалим.

Слава, и ныне, Богородичен:

Настави ны на путь покаяния, * уклоняющыя присно к безпутием зол, * и Преблагаго прогневающыя Господа, * неискусобрачная благословенная Марие, * прибежище отчаянных человек, * Божие пребывание.

Песнь 4

Ирмос: Гору Тя благодатию приосененную, * прозорливьма Аввакум усмотрив очима, * из Тебе изыти Израилеву * провозглашаше святому, * во спасение наше и обновление.

Возсияй ми Богоначалие Трисолнечное, сияньми Твоих богодетельных озарений, в сердечных очесех доброте мечтатися, еже паче ума богоначальныя Твоя светлости, и светодетельнаго и сладкаго причастия.

Первее небеса утвердил еси Господи, и всю силу их словом Твоим вседетельным, и Духом уст соестественным, с нимиже владычествуеша всяческими в Трисиятельне единоначалии Божества.

Слава: Яко создал еси мя по образу Твоему и по подобию, Богоначальная и Вседетельная Троице, неслиянная Единице вразуми, просвети, во еже творити волю Твою святую, благу в крепости, и совершенную.

Богородичен: Родила еси от Троицы Единого Пречистая, Богоначальнейша Сына, воплощася нас ради из Тебе, озаряюща земнородных, Трисолнечнаго Божества невечерним светом и сияньми.

Песнь 5

Ирмос: Просветивый сиянием * пришествия Твоего Христе, * и осветивый крестом Твоим міра концы, * сердца просвети светом Твоего богоразумия, * православно поющих Тя.

Яже первой ангельской непосредственне утвари, неприступными Твоя доброты лучами осияваемой быти баговоливши, Твоими светлостьми просвети, Троице Единоначальственнейшая, православно Тебе поющих.

Ныне естество, единственное Богоначалия Трисолнечное, воспевае Тебя, Еже осуществовала еси за благодать, прегрешений избавление и напастей испрошающа, и бед и скорбей.

Слава: Отца, и Сына, и Духа Святаго, Едино Естество и Божество верою славим, делительное, нераздельное, Единого Бога невидимья и видимья же твари.

Богородичен: Речения вся пророческая преднаписаша, Пречистая, Твое рождество, неизреченное и неудобь сказуемое, еже мы познахом, тайноводительное Единственнаго и Трисолнечнаго Божества.

Песнь 6

Ирмос: **Обыде нас последняя бездна, * несть избавляяй, * вменихомся яко овцы заколения, * спаси люди Твоя, Боже наш: * Ты бо крепость немощствующих и исправление.**

Равностатную силу яко имущи, Троице Пресущественная, в тождестве хотения, Единица еси проста и нераздельна: Ты убо нас силою Твоею соблюди. **[Дважды]**.

Слава: Ты вся веки хотением Твоим, яко блага составила еси от не сущих, непостижимая Троице, таже и человека создала еси: но и ныне от всякаго избави мя обстояния.

Богородичен: Солнца незаходимаго дом была еси, создавшаго и в чину поставльшаго светила великая Всесильне, Пречистая Дево Богоневестная: но и ныне страстей мя избави помрачения.

Господи помилуй, **[трижды]**

Седален, глас 1.

Подобен: Гроб Твой Спасе:

Троице Святей, * и Нераздельному Естеству, * в Трех Лицах секомей несечено, * и пребывающей нераздельней * по существу Божества, * поклонимся земнороднии * со страхом, и славим * яко Творца и Владыку, Бога Преблагаго.

Слава и ныне, Богородичен:

Управи Чистая, * окаянную мою душу, * и ущедри ю от множества прегрешений, * во глубину поплзшуюся погибели, * О Всенепорочная, * и в час мя страшный смертный * Ты исхити оглаголюющих демонов, и всякия муки.

Песнь 7

Ирмос: Тебе умную Богородице, * пещь рассмотрим вернии: * якоже бо отроки спасе три Превозносимый, * мир обнови, * во чреве Твоем Всецел, * хвальный отец Бог, и препрославлен.

Слове Божий, соестественное сияние Вседержителя Бога, якоже обещал еси еже у Тебе, богодетельное вселение сотвори, яко благоутробен, со Отцем Твоим и Духом: и страшна бесом мя покажи, и страстем. **[Дважды]**.

Слава: Да Твоего благоутробия Владыко покажеша пучину нам, Сына Твоего послав к нашему смирению, паки вообразил еси на первую светлость, но и ныне Божественным мя вразуми Духом.

Богородичен: Иже на херувимстем престоле носимый, и всех Царь, во чреве Твоем девственном вселися Пречистая, всех избавляя от исления, яко Человеколюбец: но и ныне Твоими мя молитвами сохрани.

Песнь 8

Ирмос: Чуда преестественнаго * показа образ, огнеросная пещь древле: * огонь бо не опали юныя дети, * Христово являя безсеменное * от Девы Божественное рождество. * Тем воспевающе воспоем: * да благословит тварь вся Господа, и превозносит во вся веки.

Манием богодетельным, Господи всех, Триипостасне и Вседержителю, небеса простерл еси яко кожу: таже и земли повесил еси глубину, всемогущею Твоею дланию. Темже и рабы Твоя укрепи любовию и верою Твоею Человеколюбче: да Тя славим желанием во веки. **[Дважды]**.

Слава: Просвети Богоначальным светом поющих Тя, Трисолнечный Свете Лицы, Единственный же паки существом, и к Твоим светодательным лучам взирати присно: имиже насыщуся славы Твоя сладкия, и светодательныя, и пребогатя: и превозношу Тя верно во веки.

Богородичен: Вознесе на небеса, человеческое прием естество непреложен Сын Твой Пречистая Богородице, превосхождением благодати избавль древния тли. Емуже благодарственно воспеваем: да благословит тварь вся Господа, и превозносит во вся веки.

Песнь9

Ирмос: Образ чистаго Рождества Твоего, * огнепалимая купина показа неопальная: * и ныне на нас напастей свирепеющую * угасити молимся пещь, * да Тя Богородице * непрестанно величаем.

Спаси Спасителю твари, чувственныя же и умныя рабы Твоя от вражия навета и озлобления, Пресвятая Троице Единосущная, и соблюдай стадо Твое выну ненаветно. **[Дважды]**.

Слава: Да глубину неизчетную существенныя покажеша Твоя благодати, дал еси нам обеты: Трисолнечный, и Единоначальный Боже Всесильный, спасительныя Твоим рабом, ихже совершити сподоби.

Богородичен: Призри на наша моления, иже в Трех Богоначальных Ипостасех, Един сый Бог во истине веруемый: и подаждь Твоим рабом утешение, молитвами Пречистыя и Препетыя Богоматере.

Таже троичны Григория Синаита. Достойно есть: **И прочее полунощницы.**

НА УТРЕНИ

По шестопсалмии Бог Господь.

Тропарь воскресен, глас 1:

Камени запечатану от иудей, * и воином стрегущим Пречистое Тело Твое, * воскресл еси Тринедневный Спасе, * даруй ми миру жизнь. * Сего ради силы небесныя вопияху Ти Жизнодавче: * Слава Воскресению Твоему, Христе: * слава Царствию Твоему: * слава смотрению Твоему, Едине Человеколюбче. [Дважды]

Слава, и ныне, Богородичен:

Гавриилу вещавшу Тебе Дево, радуйся, * со гласом воплощашеся всех Владыка, * в Тебе Святем Кивоте, * якоже рече праведный Давид: * явилася еси ширшая небес, * поносивши Зиждителя Твоего. * Слава Всельшемуся в Тя: * слава Прощедшему из Тебе: * слава Свободившему нас Рождеством Твоим.

Таже обычное стихословие псалтиря.

По 1-м стихословию седальны воскресны, глас 1:

Гроб Твой Спасе, * воины стрегущи, * мертвии от облистания явльшагося * ангела быша, * проповедающа женам воскресение. * Тебе славим тли потребителя, * Тебе припадаем воскресшему из гроба, * и Единому Богу нашему.

Стих: Воскресни Господи Боже мой, да вознесется рука Твоя, * не забуди убогих Твоих до конца.

Ко Кресту пригвождься волею Щедре, * во гробе положен быв яко мертв Животодавче, * державу стерл еси Сильне * смертью Твоею: * Тебе бо вострепеташа вратницы адовы, * Ты совоздвигл еси от века умершья, * яко Един Человеколюбец.

Слава, и ныне, Богородичен:

Матерь Тя Божию свемы вси Деву воистинну, * и по Рождестве явльшуюся, * иже любовию прибегающии к Твоей благодати: * Тебе бо имамы грешнии предстательство, * Тебе стяжахом в напастех спасение, * Едину Всенепорочную.

По 2-м стихословию, седален, глас 1

Подобен: Камени запечатану:

Жены ко гробу приидоша урания, * и ангельское явление видевшиа трепетаху: * гроб облиста жизнь, * чудо удивляше я: * сего ради шедшиа учеником проповедаху востание: * ад плени Христос, яко Един Крепок и Силен, * и истлевшия вся совоздвиже, * осуждения страх разрушив Крестом.

Стих: Исповемся Тебе Господи всем сердцем моим, * повем вся чудеса Твоя.

На Кресте пригвоздился еси Животе всех, * и в мертвых вменился еси Безсмертный Господи, * воскресл еси тринедневен Спасе, * совоздвиг Адама от тления. * Сего ради силы небесныя вопияху Тебе, * Жизнодавче Христе: * слава Воскресению Твоему, * слава низхождению Твоему, * Едине Человеколюбче.

Слава, и ныне, Богородичен:

Марие, честное Владыки Приятелище, * воскреси ны падшья в пропасть лютаго отчаяния, * и прегрешений и скорбей, * Ты бо еси грешным спасение и помощь, * и крепкое Предстательство, * и спасеши рабы Твоя.

Таже, Блажени непорочнии:

Посем тропари: Ангельский собор:

Ипакои, глас 1:

Разбойничю покаяние рай ограде, * плачь же муроносиц радость возвести, * яко воскресл еси Христе Боже, * подай миру велию милость.

Степенны: антифон 1, глас 1, стихи повторяюще:

Внегда скорбети ми, * услыши моя болезни, * Господи Тебе зову.

Пустынным непрестанное * Божественное желание бывает, * міра сущым суетнаго кроме.

Слава: Святому Духу честь и слава, * якоже Отцу подобает, * купно же и Сыну, * сего ради да поем Троице * Единодержавие.

И ныне, тойже.

Антифон 2:

На горы Твоих * вознесл еси мя законов, * добродетельми просвети Боже, * да пою Тя.

Десною Твоею рукою * прием Ты Слове, * сохрани мя, соблюди, * да не огонь мене опалит * греховный.

Слава: Святым Духом всякая тварь обновляется, * паки текущи на первое: * Равномощен бо есть * Отцу и Слову.

И ныне, тойже.

Антифон 3:

О рекших мне, * внидем во двory Господни, * возвеселися мой дух, * срадуется сердце.

В дому Давидове страх велик: * тамо бо престолом поставленным, * судятся вся племена земная, * и языцы.

Слава: Святому Духу, честь, поклонение, * славу и державу, * якоже Отцу достоин, * и Сынови подобает приносить: * Единица бо есть Троица Естеством, * но не Лицы.

И ныне, тойже.

Прокимен, глас 1:

Прокимен: Ныне воскресну, глаголет Господь, * положуся во спасение, не обвинюся о нем.

Стих: Словеса Господня, словеса чиста.

Всякое дыхание:

Евангелие утреннее рядовое.

Воскресение Христово видевше, * поклонимся Святому Господу Иисусу, * Единому Безгрешному. * Кресту Твоему покланяемся Христе, * и Святое Воскресение Твое поем и славим: * Ты бо еси Бог наш, * разве Тебе иного не знаем, * Имя Твое именуем. * Приидите вси вернии, * поклонимся Святому Христову воскресению: * се бо прииде Крестом радость всему міру. * Всегда благословяще Господа, * поем Воскресение Его: * распятие бо претерпев, * смертию смерть разруши.

Псалом 50: Помилуй мя Боже:

Слава: **М**олитвами апостолов, * Милостиве, очисти * множества согрешений наших.

И ныне: **М**олитвами Богородицы, * Милостиве, очисти * множества согрешений наших.

Таже, глас 6: **П**омилуй мя Боже * по велицей милости Твоей, * и по множеству щедрот Твоих * очисти беззаконие мое.

Посем стихира:

Воскрес Иисус от гроба, * якоже прорече, * даде нам живот вечный, * и велию милость.

Таже: **С**паси Боже люди Твоя:

И возглас: Милостию и щедротами и человеколюбием:

Каноны: воскресный на 4: крестовоскресный на 3: и Богородичен на 3: Минеи на 4. Аще же празднуется святой, на 6: крестовоскресный на 2, и Богородицы на 2.

Канон воскресный.

Песнь 1

Ирмос: Твоя победительная десница * боголепно в крепости прославися: * та бо бессмертна, * яко всемогущая, * противная сотре, * израильтяном * путь глубины новосоделавшая.

Припев: Слава Господи святому Воскресению Твоему.

Тропарь: **И**же рукама пречистыма от персти богодетельне исперва создав мя, руке распростерл еси на кресте, от земли взывая тленное мое тело, еже от Девы приял еси.

Припев: Слава Господи святому Воскресению Твоему.

Умерщвление подъял еси мене ради, и душу смерти предал еси, **И**же вдохновением божественным душу ми вложивый, и отрешив вечных уз, и совоскресив нетлением прославил еси.

Припев: Пресвятая Богородице спаси нас.

Богородичен: **Р**адуйся благодати источнице, радуйся лестнице, и двери небесная, радуйся свещнице, и ручко золотая, и горо несекомая, **Я**же Жизнодавца Христа мірови рождающая.

Ин канон, крестовоскресный

Песнь 1, глас тойже.

Ирмос: Христос рождается, славите. * Христос с небес, срящите. * Христос на земли, возноситеся. * Пойте Господеви вся земля * и веселием воспойте, людие, *яко прославися.

Припев: Слава Господи Кресту Твоему честному и Воскресению.

Христос обожает мя воплощаяся, Христос мя возносит смиряся, Христос безстрастна мя соделоваает, стражда Жизнодавец естеством плоти. Темже воспеваю благодарственную песнь: яко прославися.

Припев: Слава Господи Кресту Твоему честному и Воскресению.

Христос возносит мя распинаемь, Христос совоскрешает мя умерщвляемь, Христос жизнь мне дарует. Темже с веселием рукама плещая, пою Спасителю победную песнь: яко прославися.

Припев: Пресвятая Богородице спаси нас.

Богородичен: Бога Дево зачала еси, Христа же в девстве родила еси из Тебе Воплощися Пречистая, Единого ипостасию Единородного, во двою же существу познаваемого Сына: яко прославися.

Ин канон, Пресвятей Богородице

Песнь 1, глас тойже.

Ирмос: Твоя победительная десница * боголепно в крепости прославися: * та бо бессмертна, * яко всемогущая, * противныя сотре, * израильтяном * путь глубины новосоделавшая.

Припев: Пресвятая Богородице спаси нас.

Кую Ти достойную песнь наше принесет неможение? точною обрадовательную, ейже нас Гавриил тайно научил есть: радуйся Богородице Дево, Мати Невестная.

Припев: Пресвятая Богородице спаси нас.

Приснодеве и Матери Царя вышних сил, от чистейша сердца вернии духовне возопиим: радуйся Богородице Дево, Мати Невестная.

Припев: Пресвятая Богородице спаси нас.

Безмерная бездна Твоего непостижимаго Рождества Всечистая, верою несумненною убо чисте приносим Ти глаголюще: радуйся Богородице Дево, Мати Невестная.

Таже минеи.

Катавасия: Отверзу уста моя ...,

Песнь 3

Ирмос: Едине ведый * человеческого существа немощь, * и милостивно в не воображся, * препояши мя с высоты силою, * еже вопити Тебе Святыи: * одушевленный храм * неизреченныя славы Твоя, Человеколюбче.

Припев: Слава Господи святому Воскресению Твоему.

Бог Сый мне Блаже, падшаго ущедрил еси, и снити ко мне благоволив, вознесл мя еси распятием, еже вопити Тебѣ Святый: Храме одушевленный неизреченныя Твоя славы Человеколюбче

Припев: Слава Господи святому Воскресению Твоему.

Живот ипостасный Христе сый, в истлевша мя, яко Милосердый Бог оболкся, в персть смертную сошед Владыко, смертную державу разрушил еси, и мертв тридневен воскрес, в нетление мя облакл еси.

Припев: Пресвятая Богородице спаси нас.

Богородичен: Бога заченши во чреве Дево, Духом Пресвятым, пребыла еси неопалима, понеже Тя купина законоположнику Моисею, палимую нежегомо, яве предвозвести, огонь нестерпимый приемшую.

Ин, Кресту :

Ирмос: Прежде век от Отца рожденному нетленно Сыну * и в последняя от Девы Воплощенному безсеменно * Христу Богу возопиим: * вознесый рог наш, * Свят еси, Господи.

Припев: Слава Господи Кресту Твоему честному и Воскресению.

Иже на свое рамо заблуждаемое овча вземшему, и низложившему древом его грех, Христу Богу возопиим: воздвигнувый рог наш, свят еси Господи.

Припев: Слава Господи Кресту Твоему честному и Воскресению.

Возведшему Пастыря Великаго из ада Христа, и священноначалием Его апостолы яве языки упасшему, истиною и Божественным вернии Духом да послужим.

Припев: Слава Господи Кресту Твоему честному и Воскресению.

Иже от Девы воплотившемуся без семени волею Сыну, и рождающую по Рождестве, Божественною силою Чистую Деву сохранившему, иже над всеми Богу возопиим: свят еси Господи.

Ин, Богородице :

Ирмос: Едине ведый * человеческого существа немощь, * и милостивно в не воображся, * препояши мя с высоты силою, * еже вопити Тебе Святый: * одушевленный храме * неизреченныя славы Твоя, Человеколюбче.

Припев: Пресвятая Богородице спаси нас.

Облак Тя легкий неложно Дево именуем, пророческим возследующе речением: прииде бо на Тебе Господь низложити египетския прелести рукотворения, и просветити сим служащия.

Припев: Пресвятая Богородице спаси нас.

Тя запечатанный воистинну лик пророческий источник, и заключенную дверь именована, девства Твоего Всепетая, явственне знаменая нам пишуща: еже сохранила еси и по рождестве.

Припев: Пресвятая Богородице спаси нас.

Ума пресущественна видети, якоже мощно, сподобься Гавриил, Дево Всенепорочная, радостный Тебе глас принесе, Слова зачатие явственне возвещающий, и неизреченное Рождество проповедающий.

Песнь 4

Ирмос: Гору Тя благодатию * Божию приосененную, * прозорливыма Аввакум * усмотрив очима, из Тебе изыти Израилеву * провозглашающе святому, * во спасение наше и обновление.

Припев: Слава Господи святому Воскресению Твоему.

Кто сей Спас иже из Едома исходя, венец нося терновен, очервленну ризу имый, на древе вися; Израилев есть Сей Святыи, во спасение наше и обновление.

Припев: Слава Господи святому Воскресению Твоему.

Видите людие непокоривии, и устыдитесь: Егоже бо яко злодея вы вознести на крест у Пилата испросисте умовредне, смерти разрушив силу, боголепно воскрес из гроба.

Припев: Пресвятая Богородице спаси нас.

Богородичен: Древо Тя Дево жизни вемы: не бо снеди плод смертоносный человеком из Тебе прозябе, но живота присносущнаго наслаждение, во спасение нас поющих Тя.

Ин, Кресту :

Ирмос: Жезл из корене Иессеова, * и цвет от него, Христе, * от Девы прозябл еси, * из горы хвальный, приосененныя чащи, * пришел еси воплощся от Неискусомужныя * Невещественный Боже: * слава силе Твоей, Господи.

Припев: Слава Господи Кресту Твоему честному и Воскресению.

Кто Сей красен из Едома, и Сего очервление ризное, от винограда восорска, красен яко Бог, яко человек же, кровию плоти ризу очервлену нося; Емуже поем вернии: слава силе Твоей Господи.

Припев: Слава Господи Кресту Твоему честному и Воскресению.

Христос будущих благ явлься Архиерей, грех наш разорил есть: и показав странен путь Своею кровию, в лучшую и совершеннейшую вниде скинию, Предтеча наш во святая.

Припев: Пресвятая Богородице спаси нас.

Богородичен: Евин древний долг испросила еси Всепетая у Иже нас ради явльшагося новаго Адама. Соединив бо Себе чистым зачатием плоть умную, одушевленную, из Тебе произыде Христос, Един во обою Господь.

Ин, Богородице :

Ирмос: Гору Тя благодатию * Божию приосененную, * прозорливыма Аввакум * усмотрив очима, из Тебе изыти Израилеву * провозглашаше святому, * во спасение наше и обновление.

Припев: Пресвятая Богородице спаси нас.

Слыши чудес небо, и внушай земле, яко Дщи перстнаго убо падшаго Адама, Богу наречена бысть, и Своему Содетелю Родительница, на спасение наше и обновление.

Припев: Пресвятая Богородице спаси нас.

Поем великое и страшное Твое таинство, премирных бо утаився чиноначалий, на Тя Иже сый сниде яко дождь на руно, Всепетая, на спасение нас поющих Тя.

Припев: Пресвятая Богородице спаси нас.

Святых святая Богородице Всепетая, чаяние языков, и спасение верных, из Тебе возсия Избавитель и Жизнодавец, и Господь: Егоже моли, спастися рабом Твоим.

Песнь 5

Ирмос: Просветивый сиянием пришествия Твоего Христе, * и осветивый крестом Твоим міра концы, * сердца просвети светом Твоего богоразумия, * православно поющих Тя.

Припев: Слава Господи святому Воскресению Твоему.

Пастыря овцам великаго и Господа, иудей древом крестным умертвиша: но Той яко овцы, мертвыя во аде погребенныя, державы смертныя избави.

Припев: Слава Господи святому Воскресению Твоему.

Крестом Твоим мир благовестив, и проповедав пленным Спасе мой оставление, державу имущаго посрамил еси Христе нага, обнищавша показавый Божественным востанием Твоим.

Припев: Пресвятая Богородице спаси нас.

Богородичен: Прощения верно просящих, Всепетая, не презри: но приими, и сия доношай Сыну Твоему Пречистая, Богу Единому Благодетелю, Тебе бо предстательницу стяжахом.

Ин, Кресту :

Ирмос: Бог сый мира, Отец щедрот, * великаго совета Твоего Ангела, * мир подавающа, послал еси нам: * тем богоразумия к свету наставльшися, * от нощи утренююще, * славословим Тя, Человеколюбче.

Припев: Слава Господи Кресту Твоему честному и Воскресению.

О богатство, и глубину премудрости Божия! Премудрия объемляй Господь, от сих коварства избавил есть нас: пострадав бо волею немощию плотскою, Своею крепостию, животворяй мертвыя воскресил есть.

Припев: Слава Господи Кресту Твоему честному и Воскресению.

Бог сый соединяется плоти нас ради: и распинается, и умирает: погребается, и паки воскресает, и восходит светло с плотию Своею Христос ко Отцу: с неюже придет, и спасет благочестно Тому служащия.

Припев: Пресвятая Богородице спаси нас.

Богородичен: Святых Святая Дево Чистая, святых Святого родила еси, всех освящающаго Христа Избавителя. Темже Тя Царицу, и Владычицу всех яко Матерь Зиждителя тварей проповедуем.

Ин, Богородице :

Ирмос: Просветивый сиянием пришествия Твоего Христе, * и осветивый крестом Твоим міра концы, * сердца просвети светом Твоего богоразумия, * православно поющих Тя.

Припев: Пресвятая Богородице спаси нас.

Веселятся небесныя силы зряще Тя: радуются с ними человек собрания: Рождеством бо Твоим совокупишася, Дево Богородице, еже достойно славим.

Припев: Пресвятая Богородице спаси нас.

Да движатся вси языцы человечести и мысли, к похвале человеческого воистинну удобрения, Дева предстоит яве славящи, верую Тоя поющих чудеса.

Припев: Пресвятая Богородице спаси нас.

Славится пение всепремудрых и похвала, Деве и Матери Божии приносимая: славы бо бысть Сия Храм Пребожественныя, Юже достойно славим.

Песнь 6

Ирмос: Обыде нас последняя бездна, * несть избавляй, * вменихомся яко овцы заколения, * спаси люди Твоя, Боже наш: * Ты бо крепость немощствующих и исправление.

Припев: Слава Господи святому Воскресению Твоему.

Согрешением первозданнаго Господи, люте уязвихомся, раною же исцелихомся Твоею, еюже за ны уязвился еси Христе: Ты бо крепость немощствующих и исправление.

Припев: Слава Господи святому Воскресению Твоему.

Возвел ны еси из ада Господи, кита убив всеядца, Всесильне, Твоею державою низложив того силу: Ты бо Живот, и Свет еси, и Воскресение.

Припев: Пресвятая Богородице спаси нас.

Богородичен: Веселятся о Тебе Дево Пречистая, рода нашего праотцы, Едем восприемше Тобою, егоже преступлением погубиша: Ты бо Чистая, и прежде Рождества, и по Рождестве еси.

Ин, Кресту :

Ирмос: Из утробы Иону младенца изблева морской зверь, * якова прият: * в Деву же всельшееся Слово, * и плоть приемшее, пройде сохраняющее нетленну, * егоже бо не пострада истления, * Рождшую сохрани неврежденну.

Припев: Слава Господи Кресту Твоему честному и Воскресению.

Ум сый безстрастен и невестествен, примешается Христос Бог человеческому уму, ходатайствующему Божественным естеством, плоти же дебелством, и всему мне непреложен весьма соединися: да спасение всему мне падшему подаст распинаемь.

Припев: Слава Господи Кресту Твоему честному и Воскресению.

Падает прельстився Адам, и запявыйся сокрушается, надеждою оболган сый древле обожения: но востает соединением Слова обожаемь, и страстию безстрастие приемлет, на престоле яко Сын славится, седяй со Отцем же и Духом.

Припев: Пресвятая Богородице спаси нас.

Богородичен: Недр не отступль Безначальна Родителя, в недрах Чистыя Отроковицы водворяется, и бывает, Иже прежде безматерен, без отца воплощаемый, Иже правдою царствуй Бог: Сего неродословен страшный род и неизреченен.

Ин, Богородице :

Ирмос: Обыде нас последняя бездна, * несть избавляй, * вменихомся яко овцы заколения, * спаси люди Твоя, Боже наш: * Ты бо крепость немощствующих и исправление.

Припев: Пресвятая Богородице спаси нас.

Предстоят раболепне Рождеству Твоему чини небеснии, дивящися достойно Твоему безсеменному Рождеству Приснодево: Ты бо Чистая, и прежде Рождества, и по Рождестве еси.

Припев: Пресвятая Богородице спаси нас.

Воплотися прежде сый Безплотен, Слово из Тебе Пречистая, всяческая волею творяй, безтелесных воинства приведый от небытия яко Всесилен.

Припев: Пресвятая Богородице спаси нас.

Умерщвлен бысть враг живоносным Твоим плодом Богоблагодатная: и попран бысть ад проявленне, и иже во узах свободихомся. Темже воию: страсти разруши сердца моего.

Кондак, глас 1:

Подобен: Егда приидеши:

Воскресл еси яко Бог из гроба во славе, * и мир совоскресил еси, * и естество человеческое яко Бога воспевае Тя, * и смерть исчезе: * Адам же ликует Владыко, * Ева ныне от уз избавляема радуется зовущи: * Ты еси, Иже всем подая Христе * воскресение.

Икос: **В**оскресшаго тридневно воспоем яко Бога Всесильна, и врата ада стершаго, и яже от века из гроба воздвигшаго, мурносицам явльшагося, якоже благоизволил есть, прежде сим еже радуйтесь, рекий: и апостолом радость возвещая, яко Един Жизнодавец. Темже верою жены учеником знамения победы благовествуют, и ад стенет, и смерть рыдает: мир же веселится, и вси с ним радуются. Ты бо подал еси Христе всем Воскресение.

Песнь 7

Ирмос: Тебе умную Богородице, * пещь рассмотрим вернии: * якоже бо отроки спасе * три Превозносимый, * мир обнови во чреве Твоем всецел, * хвальный отец Бог, и препрославлен.

Припев: Слава Господи святому Воскресению Твоему.

Убояся земля, сокрыся солнце, и померче свет, раздрася церковная божественная завеса, камене же разседеся: на кресте бо висит Праведный, Хвальный отец Бог, и препрославлен.

Припев: Слава Господи святому Воскресению Твоему.

Ты быв аки беспомощен, и уязвен в мертвых волею нас ради превозносимый, вся свободил еси, и державною рукою совоскресил еси, хвальный отец Бог, и препрославлен.

Припев: Пресвятая Богородице спаси нас.

Богородичен: Радуйся, источнице присноживья воды. Радуйся, раю пищный. Радуйся, стено верных. Радуйся Неискусобрачная. Радуйся всемирная Радосте, Еюже нам возсия Хвальный отец Бог и препрославлен.

Ин, Кресту :

Ирмос: Отроцы благочестию совоспитани, * злочестиваго веления небрегше, * огненнаго прещения не убояшася, * но посреди пламене стояще пояху: * отец Боже благословен еси.

Припев: Слава Господи Кресту Твоему честному и Воскресению.

Древле убо проклята бысть земля Авелевою очервленившия кровию, братоубийственною рукою: боготочною же кровию благословися окроплена, и възыграюще вопиет: отец Боже, благословен еси.

Припев: Слава Господи Кресту Твоему честному и Воскресению.

Да рыдают иудейстии богопротивнии людие, дерзости убиения Христова: языцы же да веселятся, и руками да восплещут, и вопиют: отец Боже благословен еси.

Припев: Слава Господи Кресту Твоему честному и Воскресению.

Се мруносицам облистай, вопияше ангел: Воскресения Христова приидите и видите знамения, плащаницу и гроб, и возопийте: отцев Боже благословен еси.

Ин, Богородице :

Ирмос: Тебе умную Богородице, * пещь разсмотрим вернии: * якоже бо отроки спасе * три Превозносимый, * мир обнови во чреве Твоем всецел, * хвальный отцев Бог, и препрославлен.

Припев: Пресвятая Богородице спаси нас.

Тя Богородице лествицу Иаков пророчески разумеает: Тобою бо Превозносимый на земли явися, и с человеки поживе, яко благоволи, Хвальный отцев Бог и Препрославлен.

Припев: Пресвятая Богородице спаси нас.

Радуйся Чистая, из Тебе пройде Пастырь, Иже во Адамову кожу оболкся воистинну, Превозносимый, во всего мя человека, за благоутробие непостижное: Хвальный отцев Бог и Препрославлен.

Припев: Пресвятая Богородице спаси нас.

Новый Адам от чистых кровей Твоих Превечный Бог бысть воистинну, Егоже ныне моли, обетшавшаго мя обновити зовуща: Хвальный отцев Бог и Препрославлен.

Песнь 8

Ирмос: В пещи отроцы Израилевы, * якоже в горниле добротою благочестия, * чистее злата блещахуся, глаголюще: * благословите вся дела Господня Господа, * пойте и превозносите во вся веки.

Припев: Слава Господи святому Воскресению Твоему.

Иже волею вся творяй, и претворяяй, обращай сень смертную в вечную жизнь, страстию Твоею Слове Божий, Тебе непрестанно вся дела Господня Господа поим, и превозносим во вся веки.

Припев: Слава Господи святому Воскресению Твоему.

Ты разорил еси сокрушение Христе, и окаянство, во вратех и твердынях адовых, воскрес из гроба тридневен. Тебе непрестанно вся дела яко Господа поют, и превозносят во вся веки.

Припев: Пресвятая Богородице спаси нас.

Богородичен: Яже без семени и преестественне от облистания Божественнаго Рождшую бисера многоценнаго Христа, воспоим глаголюще: благословите вся дела Господня Господа, пойте и превозносите Его во вся веки.

Ин, Кресту :

Ирмос: Чуда преестественнаго, росодательная изобрази пещь образ, * не бо яже прият палит юныя, * яко ниже огонь Божества Девы, * в Нюже вниде

утробу. * Тем воспевающе воспоем: * да благословит тварь вся Господа, * и превозносит во вся веки.

Припев: Слава Господи Кресту Твоему честному и Воскресению.

Приидите людие, поклонимся месту, на немже стояте пречистей нозе, и на древе божественней Христове длани животворящей простростесь, на спасение всех человеков, и гроб животный обстояще, поим: да благословит тварь всякая Господа, и превозносит во вся веки.

Припев: Слава Господи Кресту Твоему честному и Воскресению.

Обличися богоубийц иудеов пребеззаконное оклеветание: Егоже бо лестца нарекоша, воста яко Силен, наругався безумным печатем. Темже радуящеся воспоем: да благословит тварь всякая Господа, и превозносит во вся веки.

Припев: Благословим Отца и Сына и святого Духа Господа.

Троицен: **В** трех священных богословяще и Едином Господьстве славу серафими пречистии, со страхом раболепно Триипостасное славят Божество. С нимиже и мы благочестующе воспоем: да благословит тварь всякая Господа, и превозносит во вся веки.

Ин, Богородице :

Ирмос: **В** печи отроцы Израилевы, * якоже в горниле добротою благочестия, * чистее злата блещахуся, глаголюще: * благословите вся дела Господня Господа, * пойте и превозносите во вся веки.

Припев: Пресвятая Богородице спаси нас.

Чертог световидный, из негоже всех Владыка, яко Жених произыде Христос, воспоем вси вопиюще: вся дела Господня Господа пойте, и превозносите во вся веки.

Припев: Пресвятая Богородице спаси нас.

Радуйся Престолу славный Божий, радуйся верных стено, Еюже сущым во тьме возсия свет Христос, Тебе блажащым, и вопиющым: вся дела Господня Господа пойте, и превозносите во вся веки.

Припев: Пресвятая Богородице спаси нас.

Спасению виновнаго нам Господа рождши, моли о всех вопиющих прилежно, Дево Всепетая: благословите вся дела Господня Господа, пойте и превозносите во вся веки.

Таже поем песнь Богородицы: Величит душа моя Господа:

С припевом: Честнейшую херувим:

Песнь 9

Ирмос: **Образ** чистаго Рождества Твоего, * огнепалимая купина показа неопальная: * и ныне на нас напастей * свирепеющую угасити молимся пещь, * да Тя Богородице * непрестанно величаем.

Припев: Слава Господи святому Воскресению Твоему.

О како, людие беззаконнии и непокоривии, лукавая совещающе, гордаго и нечестиваго оправдиша: Праведнаго же на древе осудиша Господа славы, Егоже достойно величаем!

Припев: Слава Господи святому Воскресению Твоему.

Спасе Агнче Непорочне, Иже міра грехи вземый, Тебе славим воскресшаго тридневно, со Отцем и Божественным Твоим Духом, и Господа славы: Егоже богословяще, величаем.

Припев: Пресвятая Богородице спаси нас.

Богородичен: Спаси люди Твоя, Господи, ихже стяжал еси честною Твоею кровию, церквам Твоим подавая мир, Человеколюбче, Богородицы молитвами.

Ин, Кресту :

И ирмос: Таинство странное вижу и преславное: * небо, вертеп: * престол херувимский, Деву: * ясли, вместилище, * в нихже возлеже Невместимый Христос Бог, * Егоже воспевающе величаем.

Припев: Слава Господи Кресту Твоему честному и Воскресению.

Прославися неизреченною силою Твоею крест Твой, Господи, немощное бо Твое паче силы всем явися: имже сильнии убо низложени быша на землю, и нищии к небеси возводими бывають.

Припев: Слава Господи Кресту Твоему честному и Воскресению.

Умертвися мерзкая наша смерть, из мертвых Воскресением: Ты бо явися сущым во аде Христе, живот даровал еси. Темже Тя яко жизнь и воскресение и свет Ипостасный поюще величаем.

Припев: Благословим Отца и Сына и святого Духа Господа.

Троицен: Безначальное естество и Непредельное, в Трех познавается Единствех, Богоначальных Ипостасех Единое Божество, во Отце, и Сыне, и Дусе: на Неже богомудрии людие уповающе, спасаемся.

Ин, Богородице :

Ирмос: Образ чистаго Рождества Твоего, * огнепалимая купина показана неопальная: * и ныне на нас напастей * свирепеющую угасити молимся пещь, * да Тя Богородице * непрестанно величаем.

Припев: Пресвятая Богородице спаси нас.

Из корене Давидова прозябла еси пророческаго Дево, и богоотческаго: но и Давида яко воистинну Ты прославила еси, яко рождши пророчествованнаго Господа славы: Егоже достойно величаем.

Припев: Пресвятая Богородице спаси нас.

Всяк похвальный, Пречистая, закон побеждается величеством славы Твоея. Но о Владычице, от раб Твоих недостойных, от любве Тебе приносимое прими, Богородице, со усердием пение похвальное.

Припев: Пресвятая Богородице спаси нас.

О паче ума чудес Твоих! Ты бо Дево едина паче солнца, всем дала еси разумети новейшее чудо, Всечистая, Твоего Рождества непостижимаго. Темже Тя вси величаем.

По катавасии ектенія малая. Таже, Свят Господь Бог наш: трижды.

Посем екзапостиларий утренний.

На хвалитех стихиры воскресны, глас 1:

Стих: Сотворити в них суд написан * слава сия будет всем преподобным Его.

Поем Твою, Христе, * спасительную страсть, * и славим Твое Воскресение.

Стих: Хвалите Бога во святых Его * хвалите Его в утверждении силы Его.

Крест претерпевый, * и смерть упраздненный, * и воскресый из мертвых, * умири нашу жизнь, Господи, * яко един Всесилен.

Стих: Хвалите Его на силах Его * хвалите Его по множеству величества Его.

Ада пленивый, * и человека воскресивый, * Воскресением Твоим Христе, * сподоби нас чистым сердцем, * Тебе пети и славити.

Стих: Хвалите Его во гласе трубнем * хвалите Его во псалтири и гуслех.

Боголепное Твое снисхождение славяще, * поем Тя Христе. * Родился еси от Девы, * и не разлучен был еси от Отца, * пострадал еси яко человек, * и волею претерпел еси крест, * воскресл еси от гроба, * яко от чертога произшед * да спасеши мир, * Господи слава Тебе.

Ины стихиры, Анатолиевы, глас тойже:

Стих: Хвалите Его в тимпане и лиц * хвалите Его во струнах и органе.

Егда пригвоздился еси на древе крестнем, тогда умертвися держава вражия: тварь поколебася страхом Твоим: и ад пленен бысть державою Твоею: мертвыя от гроб воскресил еси, и разбойнику рай отверзл еси: Христе Боже наш слава Тебе.

Стих: Хвалите Его в кимвалех доброгласных * хвалите Его в кимвалех восклицания: всякое дыхание да хвалит Господа.

Рыдающа со тцанием гроба Твоего дошедша честныя жены, обретши же гроб отверст, и уведевшия от ангела новое и преславное чудо, возвестиша апостолом: яко воскресе Господь, даруяй миру велию милость.

Стих: Воскреси Господи Боже мой * да вознесется рука Твоя, не забуди убогих Твоих до конца.

Страстей Твоих Божественным язвам поклоняемся Христе Боже, и еже в Сионе владычнему священнодействию, на конец веков богоявленне бывшему: ибо во тьме спящия, Солнце просвети правды, к невечернему наставляя сиянию: Господи слава Тебе.

Стих: Исповемся Тебе Господи всем сердцем моим * поем вся чудеса Твоя.

Любомятежный роде еврейский внушите, где суть, иже к Пилату пришедши: да рекут стрегущии воины: где суть печати гробныя? где преложен бысть Погребенный? где продан бысть Непроданный? како украдено бысть Сокровище? что оклеветуете Спасово востание пребеззаконии иудей? воскресе Иже в мертвых свободь, и подает миру велию милость.

Слава, стихира евангельская утренняя.

И ныне: Преблагословенна еси Богородице Дево, воплощшим бо ся из Тебе ад пленися, Адам воззвася, клятва потребися, Ева свободися, смерть умертвися, и мы ожихом, тем воспевающе вопием: благословен Христос Бог благоволивый тако, славо Тебе.

Славословие великое. Таже, тропарь воскресен:

Днесь спасение миру бысть, поем Воскресшему из гроба, и Начальнику жизни нашея: разрушив бо смертию смерть, победу даде нам, и велию милость.

И отпуст

НА ЛИТУРГИИ

Изобразительная, блаженна, глас 1:

Снедию изведе из рая враг Адама: Крестом же разбойника введе Христос вонь, помяни мя, зовуща, егда приидеши во Царствии Твоем.

Стих: Блажени чистии сердцем, яко тии Бога узрят.

Покланяюся страstem Твоим, славословлю и Воскресение со Адамом и разбойником, со гласом светлым вопию Ти: помяни мя Господи, егда приидеши во Царствии Твоем.

Стих: Блажени миротворцы, яко тии сынове Божии нарекутся.

Распялся еси безгрешне, и во гробе положился еси волею: но воскресл еси яко Бог, совоздвигнувший Себе Адама, помяни мя, зовуща, егда приидеши во Царствии Твоем.

Стих: Блажени изгнани правды ради, яко тех есть Царство Небесное.

Храм Твой телесный тридневным Воскресивый погребением, со Адамом, и иже от Адама, воскресил еси Христе Боже: помяни нас зовущих, егда приидеши во Царствии Твоем.

Стих: Блажени есте, егда поносят вам, и ижденут, и рекут всяк зол глагол на вы лжуще Мене ради.

Муриносицы приидоша плачуща, на гроб Твой Христе Боже, зело рано: и в белых ризах обретоша ангела сидяща, что ищете? зовуща. Воскресе Христос, не рыдайте прочее.

Стих: Радуйтесь и веселитесь, яко мзда вапша многа на небесех.

Апостоли Твои Господи на гору, аможе повелел еси им, пришедше Спасе, и Тя видевшие поклонишася. Ихже и послал еси во языки учити и крестити я.

Слава, Троицен: Отцу поклонимся, и Сына славословим, и Пресвятаго Духа вкупе воспоем, зовуще и глаголюще: Всесвятая Троице, спаси всех нас.

И ныне, Богородичен: Матерь Твою приводят Ти в молитву, людие Твои Христе: мольбами Ея щедроты Твоя даждь нам Благий, да Тя прославляем, из гроба нам возсиявшаго.

Тропарь воскресен, глас 1:

Камени запечатану от иудей, * и воином стрегущим Пречистое Тело Твое, * воскресл еси Тридневный Спасе, * даруяй миру жизнь. * Сего ради силы небесныя вопияху Ти Жизнодавче: * Слава Воскресению Твоему, Христе: * слава Царствию Твоему: * слава смотрению Твоему, Едине Человеколюбче.

Кондак, глас 1:

Воскресл еси яко Бог из гроба во славе, * и мир совоскресил еси, * и естество человеческое яко Бога воспевае Тя, * и смерть исчезе: * Адам же ликует Владыко, * Ева ныне от уз избавляема радуется зовущи: * Ты еси, Иже всем подая Христе * воскресение.

Прокимен, глас 1:

Прокимен: Буди, Господи, милость Твоя на нас, якоже уповахом на Тя.

Стих: Радуйтесь праведнии о Господе, правым подобает похвала.

Аллилуиа глас 1: Бог даждь отмщение мне, и покоривый люди под мя.

Стих: Величай спасения Царева, и творяй милость христу своему Давиду, и семени его до века.